

Aalisakkanik tunitsivinni suliffissuarnilu Pisortanit aningaasaliiffiqineqarlutik ingerlanneqartuni tamani tunisassiornermut ataatsimiititaliaqalernissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Aleqa Hammond, Siumut)

Akissuteqaat.

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera.

Aleqa Hammond, Siumut, aalisakkanik tunitsivinni suliffissuarnilu Namminersorlutik Oqartussanik aningaasaliiffiqineqarlutik ingerlanneqartuni tamani tunisassiornermut ataatsimiititaliaqalernissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuummik saqqummiussivoq.

Tunisassiornermik ataatsimiititaliat 1990 sioqqullugu Namminersornerullutik Oqartussat Tunisassiorfiata Royal Greenland A/S-imik pilersitsinikkut allaangortinneqannginnerani atuupput. Taamanikkut Kalaallit Nunaanni Namminersornerullutik Oqartussat Tunisassiornermi ingerlatsiviini tunisassiornermut ataatsimiititaliat pillugit Namminersornerullutik Oqartussat nalunaarutaat nr. 26, 2. oktober 1985-imeersoq tunngavigineqarpoq. Namminersornerullutik Oqartussat Tunisassiornermi ingerlatsiviisa Royal Greenland A/S-imik pilersitsinerneq namminersortunngorsarneqarneranut atatillugu tunisassiornermut ataatsimiititaliat atorunnaarsinneqarput.

Namminersornerullutik Oqartussaata suliffeqarfiutaasa assigiinngitsut ingerlatseqatigiiffittut ingerlanneqalernerisa (aamma tassani Royal Greenland A/S-ip pilersinneqarnerata) kingorna Naalakkersuisut aalajangiusimavaat ulluinnarni aqutsineq ingerlatseqatigiiffinni ulluinnarni aqutsisut akisussaaffigaa. Qulliusumik aqutsineq ingerlatseqatigiiffiit siulersuisuisa akisussaaffigaa.

Naalakkersuisut kissaatigaat ingerlatseqatigiiffinni Namminersorlutik Oqartussat pigisaanni siulersuisut ulluinnarnilu aqutsisut pisussaaffii kiisalu Naalakkersuisut pisortatut akisussaaffigisaasa immikkoortilluinnarneqarnissaat.

Royal Greenland A/S ullumikkut Namminersorlutik Oqartussat ingerlatseqatigiiffiatut ingerlatseqatigiiffittut nalinginnaasutut immikkut aqutsisoqarluni imminullu aningaasatigut napatinnissamik siunertaqarluni atuuppoq, allatut oqaatigalugu ingerlatseqatigiiffik pisortat karsiannit taperneqarani ingerlasinnaassuseqartariaqarpoq.

Aktiaateqarluni ingerlatseqatigiiffik ingerlalluassappat pisortatut aqunneqarnermi pissutsit erseqqilluinnartariaqarput, aqutsinermilu periutsit aalajangersimalluinnarlutik kiisalu pisortaqtigiit aqutsisuullutik. Tunisassiornermi ataatsimiititaliaq pilersinneqassappat pisortallu ilaat taassuma ataanut inissinneqassappata, taava pisortat aqutsinerat nalorninarsisinneqarsinnaavoq, taamaalillunilu ingerlatseqatigiiffiup aqunneqarneranut akornusersuutaassalluni. Aktiaateqarluni ingerlatseqatigiiffeqarnermi sinaakkutit iluanni tunisassiornermut ataatsimiititaliaq pisortaqtigiit ulluinnarni ingerlatsineranik akornusersuisutut inississaaq.

Royal Greenland A/S suliffeqarfiuvoq nunarsuarmiunik allanik unammillerteqartoq, taamaattumillu suliffeqarfissuaq pitsaasumik aqunneqartariaqarpoq unammillersinnaanera qulakkeerniarlugu.

Soqutigisanik assigiinngitsunik - soorlu sulisorisanik, pisiffigisartakkanik illoqarfimmilu piffimmi inuiaqatigiinnik - naalaarluaarsinnaaneq ingerlatseqatigiiffimmik aqutsilluarnerup ilagilluinnarpa. Tamanna pisortatiguunnginnerusumik periuseqarluni ingerlanneqarsinnaavoq, kisiannili aamma soorlu suleqatigiinnissamut ataatsimiititaliaq aqutugalugu pisortatigoornerusumik ingerlanneqarsinnaalluni kiisalu ingerlatseqatigiiffiit aqunneqarneranni malittarisassani sulisut siulersuisuni sinniisoqartarnissaat pillugu aalajangersakkani.

Siunnersuutinni tunisassiorfeqarfiit tunitsiveqarfiillu ingerlalluarneqartussaanerannik allapputit. Tamanna Naalackersuisut isumaqatigilluinnarpaat, Namminersorlutimmi Oqartussat Royal Greenland A/S-imik aktiaateqarnikkut piginnittuusutut ingerlatseqatigiiffiup siulersuisunik piginnaassusilinnik anguniakkanillu pingaarnernik aalajangersaasussanik toqqaasussaapput kiisalu siulersuisut pisortanik anguniakkat pingaarnernit naapertorlugit suliffeqarfimmik ingerlatsisunik qulakkeerinnittussatut akisussaasuupput.

Siunnersuutinnittaaq allapputit tunisassiorfiit tunitsiviillu akileraarutininik aningaasalersorneqartut inuiaqatigiinnit sapinngisamik pitsaanerpaamik iluanaarutaasussaasut. Uani Naalackersuisut isumaqarput nunap aalisakkatigut pisuussutai inuiaqatigiinnit sapinngisamik pitsaanerpaamik iluanaarutaasussaasut anguniakkanik pingaarnernik pilersaarusiorneq atorlugu aammalu aalisarneq pillugu inatsiseqarnikkut.

Sulisorisat tunisassiornermik matusineq patsisigalugu angerlartiinnarneqaraangata, tamanna soorunami sulisorisanut ataasiakkaanut ilaqutariinnullu annertuumik aningaasartuuteqarnermik nassataqartarpoq. Sulisorisanik aqutsilluarnermi suliffeqarfimmillu ingerlatsilluarnermi ukioq kaajallallugu patajaatsumik suliat pilersaarusiorsinnaanerat ilaavoq, pisortaqaqatigiillu tamatuma sapinngisamik pitsaanerpaamik pilersaarusiornarluarnissaat akisussaaffigaat. Patajaatsumik ukioq kaajallallugu suliffeqartitsisinnaanngikkaanni pisortaqaqatigiit akisussaaffigaat sulisunut tamanna nassuiassallugu sulisunik atorfinitsitsinnginnermi.

Nunaqarfinni tunitsivinnut tunngatillugu taakku ullumikkut amerlanerit suliffeqarfinnit namminersortunit ingerlanneqarput. Taakkua Namminersorlutik Oqartussallu suleqatigiinnerat ullumikkut sullinneqarnissamik isumaqatigiissutit aqutugalugit aqunneqarput, suliffeqarfiillu piffinni assigiinngitsuni tunitsiveqarnermik ingerlatsinerup qulakkeerneqarnissaa siunertaralugu akilernerqartarput. Namminersorlutik Oqartussat ilaatigut Arctic Greenfood A/S-imik Royal Greenland A/S-imik Sisimiut Foods A/S-imillu tunitsiveqarnermut tunngatillugu sullissinissamik isumaqatigiissuteqarfigai.

Tunisassiornermik ataatsimiititalianik pilersitsinermit taarsiullugu pisussaaffiit siunnersuutinni taasatit najoqqutarineqartussat tunisassiorfinnik sullissinissamut isumaqatigiissutit atorlugit anguniarneqarsinnaapput. Taakkuli isumaqatigiissummut ilaanagerat patsisigalugu isumaqatigiissusiortut akornanni isumaqatigiinniutigineqarsinnaasut oqaatigineqassaaq. Ilimagineqarsinnaavoq illuatungerisaq aningaasat tungaatigut piumasaqaateqassasoq, tunitsiviit ataavarnerusumik ammasarnissaat piumasarineqartillugu.

Naalackersuisut isumaqarput aqutsinissamut periarfissat pigineqareersut atortariaqarigut, tassa tunisassiorfimmik piginnittutut aammalu tunitsivinnik sullissinissamik isumaqatigiissutit kiisalu

taakku aqqutigalugit aqutsineq atorlugu siunnersuutigisanni anguniakkatit angusinnaagigut. Tamanna tunngavigalugu Inatsisartunut Naalakkersuisut inassutigaat siunnersuut itigartinneqassasoq.